

# Angerlarsimaffimmi ikiorteqartitsisarneq pillugu Namminersornerullutik Oqartussat nalunaarutaat

Pisortanit ikiorsiissutit pillugit Inatsisartut peqqussutaanni nr. 10-mi 10. november 1982-imeersumi § 20, imm. 3 tunngavigalugu aalajangersarneqarput:

## Kapitali 1

### *Aalajangersakkat naliagi rmaasut*

§ 1. Angerlarsimaffimmi ikiorteqartitsineq inooqatigiinnikkut peqqissutsikkulluunniit atukkat tunngavigalugit aallartinneqarsinnaavoq, sulisut uku innersuussuteqareernerisigut:

- a) Peqqinnissaqarfimmi sulisut
- b) isumaginninnermi oqartussani sulisut.

*Imm. 2.* Angerlarsimaffimmi ikiorteqartitaanissaq inunnit ilaqutariinnilluunniit tamatumingna pisariaqartitsillutik misigisimasunit aamma qinnuteqaatigineqarsinnaavoq.

## Kapitali 2

### *Inuit pineqartut*

§ 2. Utoqqarnut, annertuumik innarluutilinnut inunnullu sivilisuumik napparsimasunut angerlarsimaffimmi ataavartumik ikiorteqartitsisoqarsinnaavoq. Ilaqutariinnut innarluutilinnik meeralinnut ilaqtaminnilluunniit innarluutilinnik meeralinnut ilaqtaminnilluunniit innarluutilimmik imminni najugaqartitsisunut taamalu angerlarsimaffimmi suliaasat nalinginnaasut suliarineqarnissaannut ilanneeriarlutik oqilisaanneqarnissamik pisariaqartitsisunut angerlarsimaffimmi ataavartumik aamma ikiorteqartitsisoqarsinnaavoq.

*Imm. 2.* Angerlarsimaffimmi ikiorteqartitsinikkut atuisut toqqissisimasumik atugaqarlutik angerlarsimaffimminniiginnarsinnaanissaat siunertarineqarpoq, taamalu paaqqinniffimmut inissinneqarnissaat pinngitsoortillugu.

§ 3. Napparsimaneq, naartuneq, ernineq illoqatigiilluunniit akornanni napparsimanerup kingorna peqqissartoqarnera pissutigalugit, angerlarsimaffimmi inersimasumut nanertuutaavallaanngitsumik illumi suliaasnik illersorneqarsinnaasumik sulisussaartinnagu angerlarsimaffimmi utaqqiisaagallartumik ikiorteqartitsisoqarsinnaavoq.

*Imm. 2.* Ikorsiinissamut tunngatillugu iliuuserisassat pilersaarusiorneqarnerannut ilaatillugu angerlarsimaffimmi utaqqiisaagallartumik aamma ikiorteqartitsisoqarsinnaavoq, tamannalu isumaginninnikkut ikorsiiniutinut allanut tapertaritinneqartutut isigineqassaaq.

*Imm. 3.* Napparsimaruluttunut imaluunniit toqulersunut qanigisaasut angerlarsimaffimmi utaqqiisaagallartumik ikiortaatinneqarsinnaapput.

### Kapitali 3

#### *Angerlarsimaffimmi ikiorteqarnermi akiliuteqartarneq*

§ 4. Angerlarsimaffimmi ikiorteqarnissamik qinnuteqartoq angerlarsimaffimmi ikiorteqartitsisariaqarnerup angerlarsimaffimmilu ikiorteqarnermi akiliuteqarnissap kommunimit naliliivigineqarnissaani paasissutissanik pisariaqartinneqartunik paasissutissiissaaq. Angerlarsimaffimmi ikiorteqartitsisarnermi akiliuteqartarneq pillugu malittarisassat Isumaginninnermut Suliffeqarnermullu Pisortaqarfiup aalajangersassavai.

*Imm. 2.* Inunnut pensionit utoqqarnullu paaqqinniffiit il.il. pillugit Inatsisartut peqqussutaat nr. 8, 22. oktober 1990-imeersoq tunngavigalugu pensionisiaqartunut angerlarsimaffimmi ataavartumik ikiorteqartinneqartunut ikiorteqartinneqarnerminnullu akiliisanngitsunut pensioninut inummut tapitigut naleqqussaasoqassaaq.

*Imm. 3.* §3, imm. 2 tunngavigalugu angerlarsimaffimmi utaqqiisaagallartumik ikiorteqartitsinermi akiliuteqartitsisoqassanngilaq.

*Imm. 4.* Akiliutit amerlassusilerneqarneranni inoqutigiit akileraaruteqaataasussanik ataatsimoorlutik isertitaat tunngavigineqassapput.

*Imm. 5.* Angerlarsimaffimmi ikiorteqartitsinermi akiliutit angerlarsimaffimmi ikiortigitinneqartup akissarsiaanit amerlanerussanngillat. Angerlarsimaffimmi ikiorteqartinneqartut ikiorneqarnertik uppersarlugi atsiortassapput.

### Kapitali 4

#### *Angerlarsimaffimmi ikiortip suliaasaarfii suliaasaalu*

§ 5. Angerlarsimaffiup ingerlaqqinnissaa siunertaralugu angerlarsimaffimmi ikiorti ilitsersuillunilu ikiorsiisassaaq. Angerlarsimaffimmi ikiorti angerlarsimaffimmi nalinginnaasumik suliaasanut, soorlu eqqiaanermut, pisiniarnermut, atisanik errorsinermut, timikkut eqqiluisaarnermut, kiassarnermut kiisalu atisalersornermut atisaajarnermullu nalinginnaasumik ikiuuttassaaq.

*Imm. 2.* Angerlarsimaffimmi ikiorteqartitsinermi oqartussaasut isumaqatigiissuteqarfigineqareersimannippata angerlarsimaffimmi ikiorti errorsersuaarnermut illulluunniit tamakkiisumik eqqiarneqarneranut ikiuunnissamut pisussaaffeqanngilaq.

*Imm. 3.* Angerlarsimaffimmi napparsimasunik paarsineq angerlarsimaffimmi ikiortip suliaassarpiaanut ilaanngilaq.

*Imm. 4.* Angerlarsimaffimmi ikiorti angerlarsimaffimmit ikiukkaminut aningaasarsinaniluunniit taarsigassarsissanngilaq, imminullu nerisaqartittussaalluni.

### Kapitali 5

#### *Aqunneqarnera*

§ 6. Angerlarsimaffimmi ikiorteqartitsineq kommunimi isumaginninnermut ataatsimiititaliamit ataavartumik aqunneqassaaq. Ulluinnarni aqutsineq pisortamit isumaginninnermut ataatsimiititaliamit ataavartumit toqqarneqarsimasumit ingerlanneqassaaq.

*Imm. 2.* Ulluinnarni aqutsisoq qaammat ilivitsoq tikillugu angerlarsimaffimmi ikiortiliinissamut akuersissuteqarsinnaavoq.

*Imm. 3. Tamatuma kingorna isumaginninnermut ataatsimiititaliaq ataavarteq aalajangiissaaq ikiorteqartitsineq sivilisunerusumik ingerlassanersoq, allatigullu ikiorsiinermik tapertalerneqassanersoq.*  
**§ 7.** Angerlarsimaffimmi ikiorteqartitsinerup oqartussanik allanik atuisunillu suleqateqarnerata ataqatigiissaarivigineqarnissaa kommunip isumaginninnermut ataatsimiititaliaata ataavartup akisussaaffigaa.

## **Kapitali 6**

### *Naammagittaa1iorsinnaaneq*

**§ 8.** Nalunaarut manna tunngavigalugu aalajangikkat isumaginninnermut tunngasut siulersorneqarnerat aaqqissuussaanerallu pillugit Inatsisartut peqqussutaanni malittarisassat nalinginnaasut malillugit naammagittaa1liuutigineqarsinnaapput.

## **Kapitali 7**

### *Atortuulersitsineq*

**§ 9.** Nalunaarut manna 1. august 1994 aallarnerfigalugu atortuulersinneqarpoq.

*Namminersornerullutik Oqartussat, 26. juli 1994*

Henriette Rasmussen

/

Nukákuluk Kreutzmann

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

